

任越菴 著

傷寒法



上海科學技術出版社

序

嘗思著書立說。必胸羅萬卷。筆無點塵。方能成一家言。後之人讀古人書。亦必與古人心心相印。乃能言之不謬。慈溪柯韻伯先生。註張仲景傷寒論六卷。復自著傷寒論翼二卷。闡未發之藏。探獨得之秘。其明辨詳晰。使仲景千古不明之案。一旦豁然。而後世觀柯氏之註論。知仲景之精微。其功德爲何如也。但流傳已廣。翻刻既多。其文義字句。類多魚豕。觀者未得洞明。咸置高閣。吾師任瀛波先生。出其先祖越菴公手鈔傷寒法祖一編。視之卽柯氏之論翼。惟於錯訛之處。細加校正。去繁從簡。悉已正定無瑕。予因抄而讀之。見其分經立論。並遵柯氏。凡業此者。當細心領會。得其精義。庶涇渭區分。自有定見。可無擔頭篋裏之弊矣。嗚呼。柯氏爲仲景功臣。任氏于柯氏之功。亦豈少哉。爰書以誌之。

道光貳拾二年歲在壬寅仲春上澣識于鋤經山房

後學清四陶觀永謹識

目次

卷上

全論大法第一	一
六經正義第二	一
合併啓微第三	五
風寒辨惑第四	一一
溫暑指歸第五	一三
瘧濕異同第六	一九
平脈準繩第七	二一

卷下

太陽病解第一	三一
陽明病解第二	三六
少陽病解第三	四三
太陰病解第四	四八
少陰病解第五	五一
厥陰病解第六	五六
製方大法第七	六二

傷寒法祖卷上

紹興任越菴遺著 後學裘吉生校

全論大法第一

按仲景自序言作傷寒雜病論合十六卷。則傷寒雜病未嘗分爲兩書也。凡條中不貫傷寒者。卽與雜病同義。如太陽之頭項強痛。陽明之胃實。少陽之口苦咽乾目眩。太陰之腹滿吐利。少陰之欲寐。厥陰之氣上撞心等症。是六經之爲病。不是六經之傷寒。乃是六經分司諸病之提綱。非專爲傷寒一症立法焉。觀五經提綱。皆指內症。唯太陽提綱。爲寒邪傷表立。五經提綱皆指熱症。惟太陰提綱。爲寒邪傷裏立。然太陽中暑發熱而亦惡寒。太陰傷熱而亦腹痛而吐利。但不離太陽主外。而太陰主內之定法。而六經分症。皆兼傷寒雜病也明矣。因太陽主表。其提綱爲外感立法。故叔和將仲景之合論。全屬傷寒。不知仲景已自明其書。不獨爲傷寒設。所以太陽篇中。先將諸病線索逐件提清。比他經更詳也。其曰太陽病。或已發熱。或未發熱。必惡寒。體痛嘔逆。脈陰陽俱緊者。名曰傷寒。是傷寒另有提綱矣。不特爲太陽傷寒之提綱。卽六經傷寒總綱。亦不外是。觀仲景獨於太陽篇。別其名曰傷寒。曰中風。曰中暑。曰濕痺。曰溫病。而他經不復分者。則一隅之舉。可以尋其一貫之理也。其他結胸。臟結。陽結。陰結。瘧熱。發黃。熱入血室。譫語。如狂等症。或因傷寒。或非傷寒。紛紜雜沓之中。正可以思

傷寒雜病合論之旨矣。蓋傷寒之外。皆雜病之名多端。不可以數計。故立六經而分司之。傷寒之中。最多雜病。內外夾雜。虛實互呈。故將傷寒雜病而合參之。正以合中見經。渭之清濁。此扼要法也。叔和不知此旨。謂瘧濕喝三種。宜應別論。則中風溫病。何得與之合論耶。以三症爲傷寒所致。與傷寒相似。故此見之。則中風非傷寒所致。溫病與傷寒不相似者。何不爲之另立耶。霍亂是肝經爲患。陰陽易。瘧後勞復。皆傷筋動骨所致。咸當屬于厥陰。何得另立篇目。叔和分太陽三症於前。分厥陰諸症於後。開後人分門類症之端。豈知仲景約法。能合百病兼該于六經。而不能逃六經之外。只在六經上求根本。不在諸病名目上尋枝葉也。叔和以私意紊亂仲景之原集。於勞復後。重集可發汗不可發汗諸篇。如弱反在關。濡反在巔。微反在上。瀼反在下。不知如何名反。豈濡弱微瀼等脈有定位乎。此類姑不悉辨。其云大法。春夏宜發汗。冬宜吐。秋宜下。設未值其時。當汗不汗。當吐不吐。當下不下。必待其時耶。而且利水清火溫補和解等法。概不言及。所以今人稱仲景。只有汗吐下三法。實是于此。夫四時者。衆人所同。受病者。因人而異。汗吐下者。因病而施也。立法所以治病。非以治時。自有此大法之謬。後人因有隨時用藥之迂。論麻黃桂枝湯者。謂宜于冬月嚴寒。而三時禁用。論白虎湯者。謂宜於夏。而大禁秋分後。與立夏之前。夫必先歲氣。毋伐天和。寒熱溫涼之逆用。爲衆人飲食之常耳。仲景因症立方。豈隨時定劑哉。當知仲景治法。悉本內經。按岐伯曰。調治之方。必別陰陽。陽病

治陰。陰病治陽。定其中外。各守其鄉。外者外治。內者內治。從外之內者。治其外。從內之外者。調其內。從內之外而盛於外者。先調其內。後治其外。從外之內而盛於內者。先治其外。後調其內。中外不相及。則治主病。又爲微者調之。其次平之。盛者奪之。寒熱溫涼。衰之以屬。隨其攸利。此大法也。仲景祖述靡遺。憲章昭著。本論所稱。發熱惡寒發於陽。無熱惡寒發於陰者。是陰陽之別也。陽病製白虎承氣以存陰。陰病製附子棗黃以扶陽。外者用麻黃桂枝以治表。內者用芒硝大黃以治裏。其于表虛裏實。表熱裏寒。發表和表。救裏攻裏。病有淺深。治有次第。方有輕重。是定其中外。各守其鄉也。太陽陽明併病。小發汗。太陽陽明合病。用麻黃湯。是外之內者。治其外也。陽明病。發熱汗出。不惡寒。反惡熱。用梔子豉湯。是從內之外者。調其內也。發汗不解。蒸蒸發熱者。從內之外而盛於外。用調胃承氣先調其內也。表未解。而心下痞者。從外之內而盛於內。當先解表。乃可攻痞。是先治其外。後調其內也。中外不相及。是病在半裏半表。大小柴胡治主病也。此卽所謂微者調之。其次平之。用白虎梔豉小承氣之類。盛者奪之。則用大承氣陷胸抵當之類矣。所云觀其脈症。知其何逆。以法治之。則寒熱溫涼。衰之以屬。隨其攸利之謂也。若拘四時以拘法。限三法以治病。遇病之變遷。則束手待斃矣。且汗吐下三法。亦出於岐伯。而利水清火調補等法。悉具焉。其曰有邪者。瀉形以爲汗。在皮者。汗而發之。實者散而瀉之。此汗家之法。中滿者。瀉之於內。血熱者宜決之。是下之之法。高者因而越之。謂吐。

下者引而竭之謂利。小便慄悍者按而收之。是清火法。氣虛宜製引之。是調補法也。夫邪在皮毛。猶未傷形。故仲景製麻黃湯。急汗以發表。邪入肌肉。是已傷其形。故用桂枝湯。吃稀熱粥以解肌。是漬形以爲汗。若邪正交爭。內外皆實。寒熱互呈。故製大青龍。於麻桂中加石膏以瀉火。是散而瀉之也。吐劑有梔豉瓜蒂。分胸中虛實之相殊。下劑有大小承氣調胃抵當。分氣血淺深之不同。利水有猪苓真武寒熱之懸絕。清火有石膏芩連輩輕重之差分。陽氣虛。加入參於附子。吳茱萸中以引陽。陰氣虛。加入參於白朮瀉心中以引陰。諸法井然。質之岐伯。纖毫不爽。前聖後聖。其揆一也。愚更有疑焉。仲景言平脈辨症。爲傷寒雜病論。是脈與症未嘗兩分也。夫因病而平脈。則平脈即在辨症中。病有陰陽。脈合陰陽。發熱惡寒發於陽。無熱惡寒發於陰。是病之陰陽也。當列全論之首。脈有大浮動滑數。名陽。沉澹弱弦微。名陰。是脈之陰陽也。此條當爲之繼。叔和既云搜採仲景舊論。錄其症候脈。是知叔和另立脈法。從此搜採耳。試觀太陽篇云。脈浮者病在表。脈浮緊者。法當身疼痛。脈浮數者。法當汗出愈。諸條脈法。不入辨脈平脈篇。是叔和搜採未盡。猶遺仲景舊格也。由此推之。知寸口脈浮爲在表。及寸口脈浮而緊。脈浮而數。諸條皆從此等處採出。脈有陰結陽結條。未始不在陽明中風中寒之間。洒淅惡寒而復發熱者。未始不在少陽寒熱往來之部。脈陰陽俱緊者。未必非少陰之文。陰陽相搏條。未必不在傷寒脈結代伏之際。設仲景另集脈法。或有上下之分。諒無平辨之別。

矣。名平名辨。皆叔和搜採諸說。仲景所云。各承家伎者是也。世徒知序例爲叔和之文。而不知仲景之書。皆係叔和改換。獨爲傷寒立論。十六卷中。不知遺棄幾何。而六經之文。夾雜者亦不少。豈猶然仲景舊集哉。此雖余見之謬。請看序例所引內經。莫不增句易字。彼尙敢改岐伯之經。況乎仲景之論耶。欲識眞仲景者。逐條察其筆法。知考功記自不合於周官。褚先生大不侔於太史乎。世皆以金匱要略爲仲景雜病論。則有若之似聖人。惟曾子爲不可強乎。

六經正義第二

按仲景自序云。雖未能盡愈諸病。其留心諸病可知。故於諸病之表裏陰陽。分爲六經。令各得所司。清理脈症之異同。寒熱之虛實。使治病者。只在六經中下手。行汗吐下和解溫補等法。而無失也。夫一身之病。俱受六經範圍者。猶周禮分六官而百職舉。司天分六氣而萬物成耳。傷寒不過六經中一症。叔和不知仲景之六經。是經界之經。而非經絡之經。妄引內經熱病論。作序例以冠仲景之書。而混其六經之政治。六經之理不明。而仲景平脈辨症。固難盡合諸病之權衡矣。夫熱病之六經。專主經脈爲病。但有表裏之實熱。並無表裏之虛寒。雖因于傷寒。而已變成熱病。故竟稱熱病。而不稱傷寒。要知內經熱病。卽溫病之互名。故無惡寒症。但有可汗可泄之法。並無可溫可補之例也。觀溫病名篇。亦稱評熱病論。其義可知矣。夫叔和不予病根上講求。但於病名上分解。故序例所引內經。既背仲景

之旨。亦舛岐伯之意也。夫仲景之六經。是分六區地面。所該者廣。雖以脈爲經紀。而不專在經絡上立說。凡風寒溫熱。內傷外感。自表及裏。有寒有熱。有實有虛。無乎不包。故以傷寒雜病合爲一症。而總名爲傷寒雜病論。所以六經提綱。各立一局。不爲經絡所拘。勿爲風寒畫定也。然仲景既云。撰用素問。當於素問之六經廣法之。按皮部論云。皮有分部。脈有經紀。其生病各異。別有部分。左右上下。陰陽所在。諸經始終。此仲景創六經部位之源。又曰。陽主外。陰主內。故仲景以三陽主外。三陰主內。又曰。在陽者主內。在陰者主出。以滲于內。故仲景又以陽明主內。少陰亦有反發熱者。故仲景于表劑中用附子。是因其滲也。又曰。少陰之陰。名曰樞。其入於經也。從陽部注於經。其出者。從陰部注于骨。故仲景製麻黃附子湯。治發熱脈沉無裏症者。是從陽部注經之義也。製附子湯。治身體骨節痛。手足寒。背惡寒。脈沉者。是從陰內注于骨之義也。又陰陽離合論。太陽爲開。故仲景以之主表。而以脈浮惡寒頭項強痛。爲提綱。立言與熱論頗同。而立意自別。陽明爲閤。故以之主裏。而以胃實爲提綱。雖曰痛鼻乾等症。而所主不在是。少陽爲樞。少陰亦爲樞。故皆在半表半裏症。少陽爲陽樞。歸重在半表。故以口苦咽乾目眩爲提綱。而不及於胸脇痛。少陰爲陰樞。其欲寐不寐。欲吐不吐。亦半表半裏症。雖有舌乾口燥等症。而不入提綱。歸重在半裏也。豈惟陽明主裏。三陰皆主裏。而陰陽異位。故所主各不同。陽明主裏症之陽。陽道實。故以胃實屬陽明。太陰主裏症之陰。陰道虛。故以自

利屬太陰。太陰爲開。又爲陰中至陰。故主裏寒而自利。厥陰爲閤。又爲陰中之陽。故主裏熱而氣逆。少陰爲陰中之樞。故所主或寒或熱之不同。或表或裏之無定。與少陽相似也。請以地理論。六經猶列國也。腰以上爲三陽地面。三陽主外而本乎表。心者三陽夾界之地。內由心胸。外自巔頂。前至頭顱。後主肩背。下及于足。內合膀胱。是太陽地面。此經統領榮衛。主一身之表症。猶近邊禦敵之國也。內自心胸。至胃及腸。外自額顱。猶面至腹。下及于足。是陽明地面。由心至咽。出口頰。上耳目。斜至巔。外自脇。內屬膽。是少陽地面。比太陽差近。陽明猶京畿矣。腰以下。爲三陰地面。三陰主裏。而不及外腹者。三陰夾界之地也。自腹由脾。及二腸魄門。爲太陰地面。自腹至兩腎。及膀胱溺道。爲少陰地面。自腹由肝。上膈至心。從脇肋。下及小腹宗筋。爲厥陰地面。此經通行三焦。主一身之裏症。猶近京夾輔之國矣。太陰陽明同居異治。猶周召分政之義。四經部位。有內外出入。上下牽引之不同。猶先王分土域民。犬牙相制之理也。若經絡之經。是六經道路。非六經地面也。六經之有正邪。客邪。合病。併病。屬脾。屬胃者。猶寇賊充斥。或在本境。或及鄰國。或入京師也。太陽地面最大。內臨少陰。外鄰陽明。故病有相關。如小便不利。本膀胱經病。少陰病。亦小便而不利者。是邪及少陰之界也。六七日不大便。頭痛身熱者。是陽明熱邪。侵入太陽之界也。頭項強痛。兼鼻鳴乾嘔者。是太陽風邪。侵入陽明之界也。心胸是陽明地面。而爲太陽之通衢。因太陽主榮衛。心胸是榮衛之本。榮衛環周不休。猶邊邑

之吏民士卒。會於京畿往來不絕也。如喘而胸滿者。是太陽外邪入陽明地面而騷擾。故稱爲太陽陽明合病。若頭不痛。項不強。胸中痞鞭。氣上衝。咽喉不得息者。此邪不自太陽來。乃陽明熱邪實結於胸中。猶亂民聚於本境而爲患也。心爲六經之主。故六經皆有 heart 煩症。如不頭項強痛。則煩不屬太陽。不往來寒熱。則煩不屬少陽。不見三陽症。則煩不屬三陽矣。故心憤憤。心怵惕。心懊憹。一切虛煩。皆屬陽明。以心居陽明地面也。陽明猶京師。故心腹皆居其地。邪在心而爲虛煩。在腹爲實熱。以心爲陽而屬無形。腹爲陰而屬有形也。夫人身之病。動關心腹。陽邪聚於心。陰邪聚於腹。肝爲陰中之陽。故能使陰邪之氣撞於心。陽明主在裏之陽。故能使陽邪入聚於腹耳。更請以兵法喻。兵法之要在明地形。知賊寇所從來。知某方是某府來路。某方是某府去路。來路是邊關。三陽是也。去路是內境。三陰是也。六經來路各不同。太陽是大路。少陰是僻路。陽明是直路。太陰近路也。少陰後路也。厥陰斜路也。客邪多從三陽來。正邪多因三陰起。由外寇自邊關至。亂民自內地生也。明六經地形。始得握百病之樞機。詳六經來路。乃得操治病之規則。如以症論。傷寒大寇也。病從外來。中風流寇也。病因旁及。雜病亂民也。病由中起。既認爲何等之賊。又知爲何地所起。于其發境。便禦之本境。移禍鄰郡。卽兩郡夾攻。如邪入太陽地面。卽汗而散之。猶陳兵器於要害。乘其未定而擊之也。邪之輕者在衛。重者在榮。尤重者在胸膈。猶賊之淺者在關外。深者在關上。尤深者在關內也。是麻黃爲關

外之師。桂枝葛根爲關上之師。大小青龍爲關內之師矣。凡外寇不靖。內地盜賊必起而應之。因立兩解法。故有大小青龍。及桂枝麻黃加減諸方。如前軍無紀。致內亂蜂起。當重內輕外。因有五苓十棗陷胸瀉心抵當等湯也。邪入少陽地面。宜雜用表裏寒熱攻補之品。爲防禦解利之法。如偏僻小路。利於短兵。不利於矛戟。利於守備。不利於戰爭也。邪之輕者。入腠理。重者入募原。尤重者入脾胃。小柴胡腠理之劑也。大柴胡募原之劑也。小建中。半夏瀉心。黃芩。黃連。四方。少陽之脾劑也。柴胡加芒硝。加牡蠣二方。少陽之胃劑也。如太陽少陽。有合病併病。是一軍犯少陽矣。用柴胡桂枝湯。是兩路分擊之師也。甚至三陽合併病。是三面受敵矣。法在獨處陽明。陽明之地。面肅清。則太少兩路之陽邪。不攻自解。但得內寇寧。而外寇自息。此白虎所由奏捷耳。若陽邪不戰於內地。用大承氣以急下之。是攻賊以護主。若陰邪直入於中宮。用四逆湯以急救其裏。是強主以逐寇也。陽明爲內地。陽明界上。卽太陽少陽地面。邪入陽明之界。近太陽地面。雖不犯太陽。太陽之師不得坐視而不救。故陽明之榮衛病。卽假麻黃等湯以汗之。近少陽地面。雖不入少陽。少陽之師不得高壘而無戰。故陽明之腠理病。卽借柴胡以解之。是知陽明之失守。非太陽不固。卽少陽無備也。所以每每兩陽相合而爲病也。若邪已在陽明地面。必出師奮擊。以大逐其邪。不使少留。故用梔枳瓜蒂之吐法以迅掃之。若深入內地。不可復驅。則當清野千里。使無所標掠。是又白虎得力處也。若邪在內廷。又當清宮。

中陰盜。此承氣所由取勝。如茵陳猪苓輩。又爲失紀之師立法矣。太陰亦內地。少陰厥陰地面。是太陰之夾界也。太陰居中州。雖外通三陽。而陰陽既已殊途。心腹更有膈膜之藩蔽。故寒水之邪。從太陽外屬者輕。由少陰內授者重。風木之邪。自少陽來侵者微。因厥陰上襲者甚。如本經正邪。轉屬陽明而爲實。猶師老勢窮。可下之而愈。如陽明實邪。轉屬本經而成虛。則邪盛正衰。溫補挽回者甚難。蓋太陰陽明地面雖分。並無阻隔。陽明猶受敵之通衢。甲兵所聚。四戰之地也。太陰猶倉廩重地。三軍所依。亦盜賊之巢穴也。故元氣有餘。則邪入陽明。元氣不足。則邪入太陰。在陽明地面。則陳師鞠旅。可背城一戰。取勝須臾。在太陰地面。則焚劫積蓄。倉廩空虛。枵腹之士。無能禦敵耳。厥陰之地。相火遊行之區也。其本氣則爲少火。若風寒燥濕之邪。一入其境。悉化爲熱。卽是壯火。其少火爲一身之生機。而壯火爲一身之大患。且其地面通達三焦。邪犯上焦。則氣上撞心。心中疼熱。消渴口爛。咽痛喉痺。逼入中焦。卽手足厥冷。脈微欲絕。飢不欲食。食卽吐衄。移禍下焦。則熱利下重。或便膿血。爲害非淺。猶跋扈之師矣。仲景製烏梅丸方。寒熱並用。攻補兼施。通理氣血。調和三焦。爲平治厥陰之主方。猶總督內地之大帥也。其與之水以治消渴。茯苓甘草湯以治水。炙甘草湯以復脈。當歸四逆以治厥。是間出銳師。分頭以救上焦之心主。而安神明也。用白虎承氣輩。清胃而平中焦之熱實。白頭翁四逆散。清脾而止下焦之熱利。是分頭以救腹中之陰。而扶胃脘之元氣耳。腎爲一府。而分陰

陽二經。少陰一經。而兼陰陽兩臟者。皆爲根本之地故也。邪有陰陽兩途。藏分陰陽二氣。如陽邪犯少陰之陽。反發熱。心煩。欬渴。咽痛。陽邪犯少陰之陰。則腹痛自利。或便膿血。陰邪犯少陰之陽。則惡寒。嘔吐。下利清穀。煩躁欲死。仲景製麻黃附子細辛。黃連阿膠。甘草桔梗。豬膚半夏苦酒等湯。禦陽邪犯少陰之陽也。其製桃花猪苓等湯。禦陽邪入少陰之陰也。附子吳萸四逆等湯。禦陰邪犯少陰之陽也。通脈四逆茯苓四逆乾薑附子等湯。禦陰邪入少陰之陰也。少陰爲六經之根本。而外通太陽。內接陽明。故初得之而反發熱。與入九日而一身手足盡熱者。是少陰陽邪侵及太陽地面也。自利純青水。心下痛。口燥舌乾者。少陰陽邪侵陽明地面也。出太陽。則用麻黃爲銳師。而督以附子入陽明。則全任大承氣。而不設監制。是猶兵家用嚮導。與本部不同法也。其陰邪侵入太陰。則理中四逆加人尿猪膽等法。亦猶是矣。嗟乎。不思仲景之所集。安能見病知原也。

合併啓微第三

病有定體。故立六經而分司之。病有變遷。更求合併病而互參之。此仲景立法之盡善也。夫陰陽互根。氣雖分而神自合。三陽之底。便是三陰。三陰之表。即是三陽矣。如太陽病。而脈反沉。便合少陰。少陰病而反發熱。便合太陽。陽明脈遲。即合太陰。太陰脈緩。即合陽明。少陽脈細小。是合厥陰。厥陰微浮。是合少陽。雖無合併之名。而有合併之實。或陽得陰而解。陰得

陽而解。或陽入陰而危。陰亡陽而逆。種種脈症。不可枚舉。學者當於陰陽兩症中。察病勢合不合。更于三陽三陰中。審其症之併與不併。於此陰病治陽。陽病治陰。扶陽抑陰。瀉陽補陰等法。用之恰當矣。三陽皆有發熱症。三陰皆有利下症。如發熱而不利。是陰陽合病也。陰陽合病。陽盛者屬陽經。則下利爲實熱。如太陽陽明合病。少陽陽明合病。太陽少陽合病。必自下利。用葛根黃芩等湯者是也。陰盛者屬陰經。則下利屬虛寒。如少陰病吐利。反發熱者不死。少陰病下利清穀。裏寒外熱。不惡寒而面色赤。用通脈四逆者是也。若陽與陽合。不合於陰。卽是三陽合病。則不下利而自汗出。爲白虎症也。陰與陰合。不合於陽。卽是三陰合病。則不發熱而吐利厥逆。爲四逆症也。併病與合病稍異者。合則一時並見。併則以次相乘。如太陽之頭項強痛未罷。遽見脈弦眩冒。心下痞鞭等症。是與少陽併病。更見讖語。卽是三陽併病矣。太陽與陽明併病。太陽症未罷者。從太陽而小發汗。太陽症已罷者。從陽明而下之。其機在惡寒惡熱而分也。然陽明之病在胃家實。太陽陽明合病。喘而胸滿者不可下。恐胃家未實耳。如陽明與太少合病。必自下利。何以得稱陽明。要知夾熱下利。卽胃實之始。內經所云暴注下迫。皆屬乎熱。其脈必浮大弦大。故得屬之陽明。而不經於太陰也。若下利清穀。裏寒外熱。脈浮而遲者。則浮不得屬之於表。而遲則爲在臟。若見脈微欲絕。卽身不惡寒而面色赤者。又當屬之少陰。蓋太陽陽明下利之辨。在清穀不清穀。而太陰少陰之清穀。又在脈之遲與微爲辨也。

夫陽明主胃實而有夾熱利。太陰主下利清穀。又因脈微細而屬少陰。少陰脈微下利。反見陽明之不惡寒。而面色赤。若不于合併病參之。安知病情之變遷如此。而爲之施治哉。然此爲六經言耳。若六經之合併。與內傷外感之合併。神而明之。不可勝極。以陰陽互根之體。見陰陽離合之用。是知六經之準繩。更屬定不定法矣。何漫云三陰無合併病也哉。

風寒辨惑第四

風寒二氣。有陰陽之分。又相因爲患。蓋風中無寒。卽是和風。一夾寒邪。中人而病。故得與傷寒相類。亦得以傷寒名之。所以四時皆有風寒。而冬月爲重也。傷寒中風。各有重輕。不在命名。而在見症。太陽篇言中風脈症者二。一曰太陽中風。陽浮而陰弱。陽浮者熱自發。陰弱者汗自出。齎齎惡寒。淅淅惡風。翕翕發熱。鼻鳴乾嘔者。桂枝湯主之。一曰太陽中風。脈浮緊。發熱惡寒。身疼痛。不汗出而煩躁者。大青龍湯主之。以二症相較。陽浮見寒之輕。浮緊見寒之重。汗出見寒之輕。不汗出見寒之重。齎齎淅淅。見風寒之輕。翕翕見發熱之輕。發熱惡寒。見寒熱之俱重。鼻鳴見風之輕。身疼見風之重。自汗乾嘔。見煩之輕。不汗煩躁。見煩之重也。言傷寒脈症者二。一曰太陽病。或未發熱。或已發熱。必惡寒。體痛嘔逆。脈陰陽俱緊者。名曰傷寒。脈浮自汗出。小便數。心煩微惡寒。腳攣急。以二症相較。微惡寒。見必惡寒之重。體痛。覺腳攣急之輕。自汗出。小便數。心煩。見傷寒之輕。或未發熱。見發熱之難。必先嘔逆。見傷寒之重。脈浮。見寒之輕。陰陽俱緊。見寒之重。

中風傷寒各有輕重如此。今人必以傷風爲輕。中風爲重。但知分風寒之中傷。而不辨風寒之輕重。於是有傷寒見風。中風見寒之遁辭也。夫風爲陽邪。寒爲陰邪。雖皆因於時氣之寒。而各不失其陰陽之性。故傷寒輕者。全似中風。獨腳攣急不是。蓋腰以上爲陽。而風傷於上也。中風重。全似傷寒。而煩燥不是。蓋寒邪嘔而不煩。逆而不燥也。然陰陽互根。煩爲陽邪。煩極至躁。躁爲陰邪。躁極致煩。故中風輕者煩輕。中風重者煩躁。傷寒重者躁煩。傷風重者微煩。微煩則惡寒亦微。是微陽足以勝微寒。故脈浮不緊矣。如本論所云。凡欲自解者。必當先煩。乃有汗而解。以脈浮不緊。故知汗出解也。若不待自解。而妄攻其表。所以亡陽。因陽微故耳。凡傷寒見煩。則寒氣欲解。躁煩是陽爲寒鬱。而邪轉盛。故傷寒一日。若躁煩者爲欲傳。六七日躁煩者。爲陽去入陰也。因病人所稟之陽氣有不同。而受邪之部位陰陽更不類。故陽有多少。熱有微甚。如太陽爲先天之巨陽。其熱發於榮衛。故一身手足壯熱。陽明乃太少兩陽相合之陽。其熱發於肌肉。故蒸蒸發熱。少陽爲半表之陽。其熱發於腠理。時開時合。故往來寒熱。此三陽發熱之差別也。太陰爲至陰。無熱可發。因爲胃行津液。以灌四旁。故得主四肢而發熱於手足。所以太陰傷寒手足自溫。太陰中風四肢煩疼耳。少陰爲封蟄之本。若少陰不藏。則坎陽無蔽。故有始受風寒。而脈沉發熱者。或始無表熱。八九日來。熱入膀胱。致一身手足盡熱者。厥陰當兩陰交盡。一陽之初生。其傷寒者。有從陰而先厥後熱者。有從陽而先熱後厥者。或陽